

钦定四库全书

集部五

屏岩小稿

别集类四

元

提要

（臣）等谨案屏岩小稿一卷元张观光撰观光字直夫东阳人其始末未详集中有和仇山村九日吟卷诗而晚春即事诗中有杜鹃亡国恨归鹤故乡情盖宋末元初人又有甲子岁旦诗考景定五年为甲子元泰定元年亦为甲子诗中有岁换上元新甲子句以厯家三元之次推之上元甲子当属泰定观其除夕即事诗中称明朝年八十则得寿颇长其时犹相及也诗多穷途之感盖不遇之士惟赠谈命姚月壶诗有试把五行推测看广文官冷几时春句其殆曾为学官者欤全集皆格意清浅颇窘于边幅然吐属婉秀无钩章棘句之态越中诗社以枕易为题李应祈次其甲乙以观光为第一其诗今见集中并载应祈批称其若纷纷盆盎中得古壘洗又有梅魂七言律诗一首注曰武林试中秋色五言律诗一首注曰山阴诗社中选盖在当日亦以吟咏擅名矣

乾隆四十六年正月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

●钦定四库全书

屏岩小稿

（元）张观光 撰

○古风

拟古五首

腕中有幽兰风露饱清抱含章不求闻坐见九秋老夫君日已远佩饰为谁好何如敛余芳山林养枯槁

骊龙有明珠奇气久磅礴一为鲛人采夜半泣海若至宝谅难得珍藏思远托如何贱所贵用之以弹雀弹雀亦何惜一去恐流落

名门有贞女始结丝萝盟嫵婉席未温良人已远行远行何时归妾身不自轻空帙守寂寞誓以终此生虽云受恩浅耿耿怀至情

山中怪物变草木自四时秋水照短髮血气日以衰寒藤不知枯青青上疎篱繁阴纵有托已迫风霜期余生方自怜孤吟欲何为

徂徠有嘉木巍巍高连天修柯濯雨露沃叶藏云烟根蟠九地暖声落四壁寒由来所养贵不与春相干岁久产茯苓土色腴且坚山人劬为药至味通灵仙愿言事服饵身可三千年

旦景

鸡鸣起濯髮披衣出户牖自汲古涧泉落月犹在手三漱吞朝霞余光散花柳兹意难语人延竚忽良久

至后

道人坐茅宇独抱无弦琴对此景物异夕云散还阴雨气一帘润云意千山深新阳畅微暄疎花点孤林芳时坐消歇孰同岁寒心孤梅发清夜庭树惊栖禽

故相贾秋壑旧府

当年构华屋权势倾卫霍堂宇穷斧斤天气焕丹雘花石拟平泉水陆致兹壑惟闻丞相嗔肯后天下乐朱门锁荆榛花木已萧索苍生颠堕崖国亡身孰托空悲上蔡犬不返华表鹤丈夫保勲名风采照麟阁胡为一声钲聚铁铸此错回头暮烟昏不能掩余恠

九日会王修竹西楼预坐者七人以落霞与孤鹜齐飞分韵予得落字即席走笔

冉冉五云深山西日光薄登楼集羣贤纵目天宇廓落木悲徂年寒光照杯酌浩歌兴悠然意行非涧谷缅怀龙山遊此乐久寂寞胡为落帽人白首恋宾幕醉余发诗情分韵尽佳作吾爱漉酒巾西风吹不落

綠珠

娉婷石家姝荣显晋朝使斛珠不论费得备巾栉侍一笑金谷春粉黛皆敛避岂知步障中乃复为愁地念主爱妾深因妾为主累楼头风月愁残花抱春坠

燕子楼

繁华随逝水日暮高楼空哀哀徐陵妾事主不及终空房辍膏沐明妆为谁容春风燕子来秋风燕子去去来影带双孤鸾抱憔悴回首醉娇时百花不敢媚

潘淑妃

二八入宫掖一笑轻三千云阶渺何许步步生金莲绣鞋不胜春风若凌波仙荣华一回首荆棘生我前君恩花上露妾心井中泉井泉誓不波下照青青天

秋胡妻

陌上桑叶稀家中蚕正饥妾心知采桑安知使君谁结发为人妇几年守空帏妇义不移天黄金欲何为老姑倚门久不待盈筐归为妾谢使君风化闕庭闈

纪梦是岁大旱

老年屏人事北窻寄高眠梦魂御风去金阙开九天虎豹狞不嗔知予有仙縁玉座拥五云香炉飞紫烟青衣两童子举手导我前下土虬虱臣愚衷欲敷宣兵戈幸休息饥饑方连绵洪惟大生德实司水旱权愿言回哀眷与世解倒悬上帝允臣请乃曰赐丰年再拜谢阙下回飙堕林泉夜雷声殷殷甘泽朝满田沉思喜且惊异梦非偶然士懷当世忧膏泽期无愆贞观有房杜斗米三文钱

夜后谢友人顾问

索居坐孤陋却扫甘隐沦荒径无辙迹蓬藿方蓁蓁风雨撼四壁一榻寄屈伸谁念

相如病岂堪原宪贫友人隔河梁懷思赋停云柴车忽过我问劳何殷勤促膝话契阔道合情更亲语言迈流俗意气含至真兴懷谈不尽浣我胸中尘盘蔬与束脯草草为尔陈瓦盆煮新酒味有太古春非徒洗磊块亦足消鬱陲北窗坐终日薄暝生秋旻斜阳恋客影把袂不忍分此去岁月迈何时复相亲我辈重道义势利何足云荣华易消歇德齿久弥新愿言保名节努力配古人

遊谢仙岩飞霞观岩下李参政墓

鬼工凿山骨何年驱六丁飞霞遶石洞缥缈开珠庭永懷谢仙伯坐断山水城我来事幽雅登临委客情松风驱溽暑自觉毛骨清猿鹤亦仙意人生空营营石麟卧荒草问是谁家莹野老对我言其人昔公卿金玉埋黄壤送日冠盖倾兴衰异百年所重非修名乃知钟鼎贵不如芝薇馨所以世外人返老还孩嬰倚杖空叹息洞口云冥冥

约王琴所不来舟中偶成

清飈卷炎埃碧水出秋素迢迢见山亭回首隔烟雾酒帘扬渔邨笳鼓响军戍倚篷问舟人云是三江路篱落鸡欲栖野水牛已渡钓翁炊荻烟稚子收渔具抱琴人不来残阳在高树

种松

去年种松树未有蒿与蓬今年松渐长埋没蓬蒿中老髯何苍苍岁华不改容回视蒿与蓬零落悲秋风

题三月梅花卷

纷纷姚魏家颜色竞妩媚人方眩春华东皇出古意素花饬鼎实縞袂立苍翠犹如喧啾中孤鳳忽呈瑞岿然山林尊坐使众芳愧

读文相吟啸稿

垂垂大厦颠一木支无力精卫悲沧海铜駝化荆棘英风傲几碣瀆死犹铁脊血洒沙场秋寒日亦为碧惟留吟啸编千载光奕奕

云间有懷

风流懷二陆才名动三吳荒冢今何许千载空烟芜当时逞文笔万象争先驱有如明月璧美价倾洪都世运有翻覆韞椟空良图惜哉去就轻丧此千金軀人生各有死百年同须臾独遗文字芳乃与天壤俱凄凄九山寨冉冉谷水枯白鹤久已寂黄犬不复呼斯人今已矣吊古空嗟吁

偶书

百岁集孤夜山楼起呼月秋虫声转悲感此众芳歇人身非金石青鬢忽已雪逾淮橘心秋出山泉水汨猗兰抱香死不受蓁莽没

鳳德嗟已衰宣尼欲浮海頼有载道经神功补元宰删诗挽风变系易忧世骇春秋笔削严西秦书乃采微义将继周逆悲大运改悠悠千古心后死文书在

古意

庭前有高树风挠无停枝寒鸟噤不鸣夜半环树飞托身未得所三匝情依依高飞  
犯霜露低飞触茆茨乾坤岂不容振羽将安之徘徊恋明月顾影徒伤悲

### 感懷

入山采芝薇豺虎据我丘入海寻蓬莱鲸鲵掀我舟山海俱有碍瞻望凝遠愁乾坤  
如许大此身常浮沔依托岂无地皇皇将安求何当跨鳳鹏相从安期遊

### 白酒歌为岩翁賦

火云烧空日色烈暑气着人方鬱结岩翁宴客水亭东竹色蕖香献清絕瓜削水晶  
莲剖珠象箸犀盘盛陈列银罍捧出白醞醅透鼻香浓风味别传来未到心已寒滟滟琼  
光莹而洁初疑炎帝行冬令壶结冰澌洗祥热又疑仙掌流沆瀣破瓮倾来和玉屑谁向  
蓝田拾瑶英酿成奇液色澄澈恐是太华井中溢修綆铜甃汲不竭又恐夜半雷破山石  
髓分流乳泉裂既非西貉绵羊酥又非缙山仙鹤血胡为照眼光陆离药玉盘中色难别  
令人敢咽不敢漱怕有飞霜寒齿颊一杯一杯复一杯肺腑尽化为冰雪忆昔曾诵坡仙  
诗白酒无声泻油滑开编自觉馋泉流詎谓今朝得亲啜主人醞藉如此酒气味清醇韵  
芳冽糟□□□□□六经抱负特施設君王作醴思用贤应向商岩求曲蘖

### 侍郎亭

东邻花圃栽双松一朝煨烬枝叶空侍郎亭前有双松至今古色摩苍穹此木受命  
本千载扶持若有神始终天留真质表文献柯叶蕃茂根本丰百年培植饱雨露虬枝风  
撼鸣笙鏞掀髯相视雪贸贸拥盖对立云童童不知天地有黄落玄冥失柄春无功云孙  
峩冠立亭下典刑如侍干淳翁昂藏自是廊庙具夭矫亦有山林风棱棱铁面不可犯麾  
去秦爵如飞蓬诸孙奉酒立松下森森头角皆虬龙

### 题东山翫月图

斜阳红尽暮云碧一片天景涵水色海涛拥出烂银盘千里婵娟共今夕主人领客  
登东山踏碎寒光看秋液星河倒影浸空明露华溥玉夜气清冯夷激水水欲立海若辟  
易天吴惊孤舟卷帆泊烟屿古木撼壑生秋声凭高人在金螯背闲看潮生烟渚外老龙  
翻海云气寒长鲸卷雪浪花碎茫茫万顷沧浪中屹立孤峯锁苍翠山颠扫石罗樽壘宾  
主传杯不放杯骚客掀髯賦诗去山童踏月携琴来剧谈浩饮不知醉仰天大笑欢颜开  
倒着接■〈𠂔离〉欲起舞乾坤清气入肺腑天边风月空四时眼底江山自千古谢安  
蹶屣遊东山袁宏登舟宴牛渚庾亮南楼今在否坡仙赤壁知何许满眼往事转头空千  
年人物俱尘土人生光景若湍流霜痕易点双鬓秋胸中勿着尘俗事眉间休锁名利愁  
我辈适意在行乐古人所以秉烛遊月山追忆旧遊处尽写风烟入缣素我来见画如见  
景想象高唐犹可賦诸君后会应可期云萍合散今何之安得扁舟澉川去日与杖履相  
追隨登山把酒对明月共看此画歌此诗

### 醉时歌

茫茫古堪輿何日分九州岛封域如许大仅能着我胸中愁澆愁须是如澆酒曲波

酿尽银河流贮以倒海千顷黄金壘酌以倾江万斛玻璃舟天为青罗幕月为白玉钩月  
边天孙织云锦制成五色蒙茸裘披裘把酒踏月窟长揖北斗相劝酬一饮一干石一醉  
三千秋高卧五城十二楼刚风冽冽吹酒醒起来披发骑赤虬大呼洪崖拉浮丘飞上昆  
仑山顶头下视尘寰一培塿挥斤八极逍遥遊

○律诗

渔隐为周仲明赋

一笠戴春雨扁舟寄此情世间尘网密江上钓丝轻不羨鱼虾利唯寻鸥鹭盟狂奴  
台下水犹作汉时清

九日偶书

水国雁已到山篱菊未开判吹头上帽莫放手中杯暮雨滕王阁西风项羽台人生  
能几履惟恨付苍苔

秋晚山行

铿然短策声无事觉身轻落叶山行软流泉涧饮清蟹痕沙露湿雁影夕阳明归路  
逢林叟班荆畝隐盟

夜坐即事

对景坐清夜萧然鬓已华诗慳难就稿灯暗不成花易醉愁边酒频归梦里家何时  
锄旧圃学种邵平瓜

禹庙送春

歌鼓满湖滨倾城出送春波光明画艇山色醉遊人书穴灵何在梅梁迹已陈我来  
闲吊古回首一沾巾

晚窻即事

一枕纱窻下池塘草梦安炷云金鸭暖滴露玉蜍寒晋帖从头写唐诗着眼看晚来  
吟思倦和月凭阑干

幽居

幽居少尘事赢得一身闲竹屋无人到柴门尽日關斜阳明晚浦落日瘦秋山隔水  
双飞鹭忘机自往还

宿龙瑞山房次周云隐韵

木叶秋容瘦客懷思故园淡云微见月一去忽经年莎草平诗屋江潮没钓船何时  
归旧隐风雨对床眠

翠峯庵即事

竟日寻幽处杖藜不惮遥客行黄叶路僧立碧溪桥岩瀑飞寒雪松风吼夜潮是山  
皆可隐何用楚词招

王修竹馆舍即事

池馆翠深处寬闲称客居未仙犹閬苑不梦亦华胥竹净堪居鹤荷香欲醉鱼心清

无个事长日一编书

寄云谷王府判

曾记还家日重来约夏初自从一别后又是十年余原宪非關病嵇康懒寄书无从问消息近况果何如

钱越守

旌旆涨天飞江山惨夕晖倾城钱州牧别泪点朝衣人指生祠说春随祖帐归自来言越瘠公去转能肥

别山阴诸友

好风残腊尽春意动园林柳色独青眼梅花同素心江湖方转纵岁月自侵寻忍别山阴去徘徊忆旧吟

赠葛秋严时寓能仁兰若

兰若分清隐秋牕饱看山风霜双鬓老天地一身闲拄杖穿云去吟囊贮月还诗成谁与语时访竹林间

书懷

平生湖海气老去叹飘蓬知命难求富安贫不送穷江空思捉月天阔欲行风俗眼从渠白无人识此翁

寄菊坡吴府判

客懷原自恶非是为秋悲一别又三载百年能几时音书无雁寄心事有鸥知遥想菊坡菊西风香满篱

夜坐即事呈修竹

一室冷于冰秋高夜气清月牕参烛影风叶乱琴声寡欲知身健安贫觉累轻吟边闲倚竹谁识此时情

晚春即事

园林芳事歇风雨暗荒城转眼青春过临头白发生啼鹃亡国恨归鹤故乡情三径多荒草东还许未成

登寶林佛阁次韵

曳杖陟高阁登临思渺然闲身空岁月老眼几山川落照明秋浦飞流湿暮烟倚阑怅今昔余恨付吟篇

夜坐读书

寂寞寒牕下观书胜苦吟青灯风雪夜黄卷圣贤心吾老關兴废斯文几古今鳳兮胡不至三叹泪沾襟

春日西园晚步

为爱园林好支筇伴独行花香能醉蝶柳色欲迷莺但得青春在何妨白发生斜阳红尽处一抹暮山横

书所寓

不厌茆庐小栖栖寄此身菊残如倦客梅瘦似诗人有地堪藏拙无医可疗贫并州  
故乡梦长忆鉴湖春

书懷寄呈诸友

寂寞茆檐下穷居更待时吾侪贫可忍余子俗难医风月偏宜酒江山都是诗广文  
无郑老谁与共襟期

题义上人清虚阁

偶来成一宿便觉与禅通看塔月影尽卷帘秋色空因知释氏学亦有晋人风吟到  
忘言处悠然此意同

秋夕和吕讲师韵

谁弹招隐操云外伴清幽午夜山林月一花天地秋经牕凉影淡禅榻古香浮不作  
蟾宫梦凄然忆旧遊

偶书

豪气消磨尽携书客海濱文章难遇主天地不怜贫家累依刘表妻儿笑买臣彼苍  
还可问吾道几时春

九日

萸节今朝是秋光又一年但教樽有酒休问篋无钱白发羞唐帽黄花识晋贤龙山  
渺何许回首思凄然

送别胡汲古

自怜身是客又送客登舟虽有重来约难禁一别愁风烟迷柳驿草树暗春洲后夜  
懷人处山空月满楼

西屿即事

松阴迷草径缓步曳吟筇秋鹤有仙意寒光无冶容渔洲烟浦笛僧寺夕阳钟回首  
来时路白云深几重

春日和韵

新晴天气好老去倦寻芳桃李自春色园林又夕阳卷帘通燕入扫径惜花香寒食  
清明近松楸忆故乡

述懷

柴门闲掩昼云护竹牕深茂草多生意枯松见古心有书消白日无术化黄金客问  
生涯事长年只苦吟

对竹

门对南邻竹青青玉万竿虽然无地种且得隔篱看露叶晴犹湿风枝夏亦寒但教  
休翦伐日用报平安

秋色【山阴诗社中选】

凭高望不极望断动愁情落日凄凉处西风点染成丹枫明野驿白水浸江城马上人回首戎戎黯客程

### 幽居

结屋依山住幽牕与静宜藤花上疎竹苔石卧荒篱挈榼童沽酒敲门客送诗老惭生计拙役役又何为

### 懷友

柴门春事尽未老故人来树密鸟相语山空花自开倾心多日别屈指几时回为问频书札何时共酒杯

### 夏夜小酌

小酌酬清兴凭阑看月移分茶醒醉客添烛了残碁萤影明桐井蛙声出草池荒城江漏遠试问夜何其

### 王修竹约观打鱼分韵得圆字

隔岸呼渔伴轻篙破晚烟鸣榔舟叶聚撒网浪花圆馋鹭窥高树惊鳞过别川洋洋聊付物生意自无边

### 新雁

来宾何太早嘹唳过南楼数点乍离塞一声初报秋行行惊客恨字字写乡愁仗节人何在帛书能寄不

### 病中

读易牕间久多时不点朱研干蟾渴水篋破蠹侵书气味如僧淡形容似鹤癯交遊空满眼谁念病相如

### 月山书馆

山色青边屋幽深称隐居瓶梅香笔砚雪冷琴书壁有先贤像门无俗客车代耕惟舌在何必耦长沮

### 秋夜独坐

黄庭重读罢掩卷对寒檠发为忧时白心因学道清一牕秋月色四壁夜蛩声坐倦闲欹枕诗成梦不成

### 九日书懷

客鬓同秋老乡心逐雁飞重阳今日是三径几时归篱下多黄菊门前少白衣无人慰岑寂独立对斜晖

### 古松

夭娇生寒翠髯蛟势倚天乔阴无六月老气已千年斲药人能寿巢枝鸟亦僊秋风响柯叶彷彿奏虞弦

### 听雪

扑簌敲牕纸寒斋剡水濱六花初落夜孤枕未眠人耳静声逾细心清趣自真爱梅



情更苦恐压一枝春

石牖为明上人赋

何年凿山骨八面锁苍苔海月照还白天风吹不开玲珑宜丈室明洁称登台眼界  
皆通透闲云任去来

对镜

勲业梦不到晓牖时一看是非须内照妍丑付旁观客鬓从渠白诗肩本自寒俨然  
瞻视处頼尔整衣冠

夜坐

世事等轻云蘧庐寄此身青灯少年梦白髮异乡人按剑惊山鬼吞丹养谷神黄庭  
重读罢吾得葆吾真

西州即事

一雨洗空碧江城独倚楼山吞残日没水挟断云流灯影深村夜钟声古寺秋西州  
旧遊地十载此淹留

春日即事

扶杖行幽径园林欲暮天锦棠红濯雨丝柳绿縹烟春事忽三月风光又一年客懷  
正愁絶那复听啼鹃

采菊

篱东闲采菊三径碧苔深晓露冷双屐秋风香一襟餐英供小酌嗅蕊伴清吟会得  
悠然处方知靖节心

春日

春色浓于酒何须醉玉觞柳疎莺占影花杂蝶分香往事随流水闲愁付夕阳吟边  
自歌舞犹学少年狂

石门

羸马东山路駉駉抵石门落花春夜雨流水暮烟村久客悲行役清愁搅梦魂劳生  
多感慨余恨付乾坤

书山阴驿

迢迢三山道重来感旧遊潮声寒带雨山色淡生秋寄驿通乡信题诗记旅愁江湖  
十年客两度到西州

江楼

凭高闲眺望老眼倍增明林白山云出潮红海日生登临懷旧恨吟笑遣闲情客里  
逢心友开樽叙昔盟

竹杖

一枝苍节瘦恰称地行仙不但挑诗卷尤堪挂酒钱看梅敲雪落引鹤卓苔穿莫近  
葛陂水化龙蜚上天

次韵书懷

风霜头已白悔不早归耕客路遠千里儒冠誤一生世情云共薄心事月同明老去  
便疎散逢人懶送迎

贈皎上人

破衲和云着何時下赤城高年头未白得道骨全清詩思秋空闊禪心夜月明何當  
捐世事來結遠公盟

王直翁相過

芒鞋朝踏雨來自赤城山久別翻生面相看各老顏開樽茅屋里煮茗竹林間此去  
須榮遇寧愁行路難

鴛鴦梅

孤花忽妖媚并蒂占春陽自有雙成意全勝姑射妝月溪同浴影雪樹共栖香玉笛  
頻吹處交飛落野塘

王琴所話別

羈懷不可述賴有古琴知客舍相逢日江楓正落時夕陽村店酒秋色野橋詩別去  
吳江上悠悠動遠思

除夜即事

除夕無詩侶燈牕酒獨斟三更風雪夜一片歲寒心衰老常憂病清閑不廢吟明朝  
年八十晚景惜榆陰

王可交升仙台四首【台在青龍鎮南】

人去台猶在飛升事可嘉神仙多變幻塵世總虛花煉氣顏雖老勞心鬢已華千年  
留古迹題咏屬詩家

異人鍾秀氣草木亦精神見說為漁父誰知悟道真仙家多勝景世路有迷津安得  
騎黃鶴相隨入昊旻

仙翁不可見惟有一空亭地冷春留雪林深昼見星松篁團秀色蘭蕙吐幽馨立盡  
斜陽影閑看鶴刷翎

我來閑吊古觸景覺淒涼踏石云侵履扞萝露濕裳森森林木茂馥馥野花香寺近  
尋僧話禪坐竹床

冬夜即事

獨寢書牕下其如寒夜何頭邊枕黃妳脚底踏湯婆紙帳梅花暖布衾春意多道人  
無妄想夢不到南柯

寄友人

相望咫尺地久不到蜗庐室迹人何處心親迹甚疎交游常念旧情意只如初我欲  
携囊去相逢勝寄書

偶書

老来惊岁晚愁里度年华云冻天将雪山寒树未花晓窗留客饭午寺觅僧茶归路  
江村暝行行及暮鸦

孤雁

长空独嘹唳隐约背斜晖塞北离羣远江南失侣归度云怜只影照水认双飞却羨  
投林鸟相呼入翠微

呈曾蒲涧提刑【乃茶山后人茶山曾以活字诗授陆放翁】

诗自茶山后如公世所稀特来参活字应肯授玄机寒涧孤芳老秋云独鹤飞台山  
千万丈望望未能归

和茅亦山韵二首

一生场屋梦老去付悠悠始信功名事难将智力谋有才如孔孟无命不伊周吾道  
今如此苍天可问不

爱静吟成僻耽书近欲痴事多因错省节不为贫移长物新添画生涯旧有诗穷通  
系天命知命复何疑

题严子陵

故人虽即位自不愿为官天下事已定山中人可闲一丝江月色千古客星寒快捷  
方式终南士闻风定赧然

除夕

爆竹惊残腊冬春此夕分且斟分岁酒懒赋送穷文客思愁檐雨乡心逐海云阳和  
在何处明日问东君

和郑梅深【有钱塘十咏】

江湖新识面恰似旧相知腹贮三余学才工十咏诗声名苏太史家世郑当时客路  
携琴去终须遇子期

即事

雀罗门户静无客扣柴扃索句髭先白看书眼尚青云粘题石壁月浸汲泉瓶笑杀  
利名客沈酣死不醒

对客

窗下篝镫坐相看白髮新共谈为客事同是异乡人诗写梅花月茶煎谷雨春明朝  
愁遠别离思欲沾巾

寒夜呈梅深

空斋对孤客寂寞似僧家炉冷频烧叶灯昏不吐花夜长添睡思岁晚忆年华吟倦  
推窗坐梅檐月未斜

林霁山架阁同宿山中

秋风山馆客移席近汀前共语忽深夜相看非少年斗垂天末树鳞出雨余天亦有  
茆檐下饭牛人未眠

遊东庵

庵连兜率寺三径竹边开林密暑不到牕虚月自来暮山啼鸟静云树啸猿哀拂拭  
残碑字年深半綠苔

贈了上人抄化

破衲卷秋云入山深更深近闻营梵刹应不累禅心寒瀑泻苍壁晚花生古林遥思  
明月夜谁听颖师琴

呈毛一斋先生

前辈雕零尽如公尚典刑为僧眉独白见客眼长青教子成三俊传家有六经我来  
问竒字应许扣柴扃

别徐敬菊

契阔又两载光阴一掷梭祇因离别久不觉语言多安得长留此其如欲去何诗盟  
终未冷早晚更相过

寄姜仕可

独学苦无友年来媿广文懷贤歌伐木忆别赋停云病后少出戶梦中多见君盍簪  
须有日却与共论文

岁晚书懷呈月山太守

光阴催我去衰病亦堪怜残腊不多日余生能几年有为俱是妄无事即成仙近得  
安心法蒲团学坐禅

鹤林仙坛寺

古坛归鹤杳野鹿自成羣岚气浮清晓钟声出白云树穿僧屋老水到寺门分人世  
无穷事山中了不闻

枕易【越中诗社试题都魁】

古鼎烟销倦点朱翛然高卧夜寒初四檐寂寂半床梦两鬓萧萧一卷书日月冥心  
知代谢阴阳回首验盈虚起来万象皆吾有收拾乾坤在草庐

考官李侍郎应祈批诗题莫难于枕易自非作家大手笔詎能模写盖以其不涉风  
云雨露江山花鸟此其所以为难也予阅三十余卷鲜有全篇纯粹正如披沙拣金使人  
闷闷忽见此作若纷纷盆盎中得古壘洗把玩不忍释手此诗起句倦字便含睡意颌联  
气象优游殊不费力曲尽枕易之妙颈联冥心回首四字极其精到结句如万马横奔势  
不可遏且有力量全篇体制合法度音调谐宫商三复降叹此必骚坛老手望见旗鼓已  
知其为大将也冠冕众作谁曰不然

棋声

何处仙翁爱手谈时闻剥啄竹林间一枰子玉敲云响几度午牕惊梦残缓着应知  
心路遠急围不放耳根闲烂柯人去收残局寂寂空亭石几寒

题李蓝溪梅花吟卷

孤芳不与众芳同肯媚东君事冶容寒苦一生苏武雪清高千古伯夷风琼瑶照树  
偏宜晚铁石盘根却耐冬几度看花立霜晓断肠都在角声中

### 秋夜

博山香冷夜将阑红影摇牕烛未残庭树露浓花气湿井梧风老叶声干世情冷暖  
知心少朋旧东西会面难一段客愁吟不就无言背月倚阑干

### 秋夜和月山韵【任月山主人也】

寒夜残灯照客愁衾单添尽鹑鹞裘半牕明月三更梦一枕西风两鬓秋吟骨棱棱  
寬帶眼归心切切望刀头何如束篋家山去独驾柴车访伯休

### 兰亭会饮观晋帖

祇说清谈晋业虚禊亭此乐后来无一时人物已陈迹千古山林空画图钟带夕阳  
来遠寺碑和春雨卧平芜昭陵玉匣犹难保笔意从谁认鼠须

### 春游次王修竹监簿韵

天色新晴带薄寒主人领客出城關兰亭觞咏寻羲帖笠石衣冠吊禹山春水断桥  
芳草碧晓风啼鸟落花闲囊中诗句壶中酒何必仙人大小还

### 修竹宴客东园

二月韶光泼眼浓携樽宴客小亭东酒当半醉半醒处春在轻寒轻暖中拂檻柳添  
吟鬢綠压阑花妬舞衣红晚来听唱梁州曲声绕吴姬扇底风

### 送张伯威提举

人生聚会等浮沤忆昔过从与胜遊棋局敲残清夜月菊花吟老半牕秋客中送客  
难为别山外看山总是愁回首片帆江路遠疎烟斜雨到西州

### 春日即事

园林芳事渐阑珊客思无聊午梦残红杏花繁蜂蜜饱碧芹香老燕泥干光阴有限  
髮已白勲业无成心尚丹倚徧吟阑天欲暮一帘风雨卷春寒

### 小酌

小酌园林酒半醺落红影里惜余春插花归去蜂随帽傍柳行来莺避人白髮尚为  
千里客黄金难铸百年身何时归赋沧浪水浣我征衣万斛尘

### 城南即事

支筇破晓出南城古寺凄迷草自生几处亭台空锁钥百年人物尽丘莹雕梁语燕  
应无主废圃残花自有情世事转头皆梦境浮生何用苦营营

### 夜坐次林梅山韵

人倚幽牕夜未阑竹炉灰冷篆烟残一天露气星辰湿万壑风声草木寒老去客懷  
多感慨年来世事转艰难何时归隐孤山下明月梅花约共看

### 有感

自叹文章不遇时平生壮志与心违十年湖海无家住千里乡關有梦归残夜月寒

灯晕淡高秋天阔雁声微伤今思古愁无奈老泪斑斑湿客衣

生朝自述

都道人生七十稀老逢初度叹衰迟飞觞醉月贫无酒走笔吟春富有诗憔悴自怜  
蒲柳质劬劳空起蓼莪思门无贺客清如水独对兰花课楚辞

雪

片片随风整复斜飘来老鬓觉添华江山不夜月千里天地无私玉万家  
飞柳絮前邨破晓压梅花羔羊金帐应粗俗自掬冰泉煮石茶

九日客怀

乌帽斜欹白发侵老来空忆旧登临一枝黄菊西风泪数畝苍苔故国心  
庭露冷雁传寒信塞云深不须贵酒酬佳节只把陶诗细细吟

舟次擣菹庙

短棹冲寒过浦东扁舟一叶载诗翁断烟流水残云外古木荒祠夕照中  
何处笛酒醒孤枕半江风潮生潮落朝还暮堪叹人生自转蓬

月夜登楼

玉宇澄清暮霭收吟边怕倚仲宣楼寒蟾千里夜如昼新雁一声天  
豪杰眼风霜易白少年头更残忽听荒城角吹老梅花总是愁

送慈川茅主簿入道

儒冠不戴戴星冠人世荣华作梦看谱出三茅终得道趣同五柳早休官  
来笙鹤春蔼慈川忆枳鸾笑指方壶最深处凌空霞佩玉珊珊

月夜次修竹韵

徙倚吟阑傍野塘古樵莲漏滴更长月阶夜静蛩声切竹院秋深鹤梦凉  
侵袂冷眠分花露满身香浩歌欲向明河去醉唤天孙织锦囊

寓浦东书怀

子规声里已非春消遣光阴只苦吟肘后无方医白发床头有易胜黄金  
年来不作功名梦老去全灰富贵心独抱焦桐遊海角纷纷俗耳少知音

呈营田司杜希圣提领

行李担书一鹤随莲香■〈巾兼〉幕政声驰山川太史九州岛记桑稼  
诗如晦箕裘传相种少陵衣钵付孙枝谋身儒术谁云拙尧舜君民正此时

寄毛素轩宣慰

旌麾曾驻鉴湖边别去匆匆又两年清夜梦分千里月同乡人各一方  
天素知心事有鸥在欲寄音书无雁传见说使星临浙右明朝便买渡江船

酒趣

浊醪妙理契心期小瓮新篘香满卮闲里一生长是醉饮中三昧有谁知  
幕天席地忘形处枕曲眠糟得意时此味灵均应未解独醒到死欲何为

### 秋懷

雨里西风已倦遊老懷悲感不禁秋世无阮籍谁青眼今有杜陵人白头雁摆行知  
兄弟义燕营巢为子孙谋谁怜湖海飘蓬客只影孤灯相对愁

### 偶书

频年踪迹坠江湖三径苔荒忆旧庐身老方知生计拙家贫渐觉故人疎松薪拾去  
朝炊黍渔火分来夜读书怨鹤惊猿应待我台山何日赋归欤

### 观史

梧风萧瑟雨初晴凉入书堂夜气清耿耿兰膏照千古迟迟莲漏转三更力于兴废  
应难助气为忠邪几不平掩卷长嗟方就枕牕前呶喔又鸡鸣

### 暮春

寂寞园林三月时客中几度见春归柳眉綠皱莺无语花脸红销蝶懒飞节物暗催  
双鬓老功名长与寸心违百年身世成何事回首西山又落晖

### 对月

万里无云天宇寬十分秋色上楼看月浮沧海蟾光湿星落明河象纬寒醉后尽教  
诗笔健吟边莫放酒杯干一声长笛知何处愁杀夜深人倚阑

### 秋夜

十分秋色满轩牕景物凄清夜气凉筛月帘枕金锁碎捣霜砧杵玉丁瑯井梧叶脱  
无多影岩桂花雕不断香坐到更深吟兴动研池滴露写诗狂

### 寓舍即事

矮屋编茆槿缚篱诗人住处恰相宜万间突兀梦不到一室凄清心自知牕下无灯  
童睡早林间有月鹤归迟八荒便作庭除看南北东西任所之

### 书懷奉简兰若提举

十年湖海叹飘零晚景投闲百念轻看水看山真有味学书学剑恨无成竹风吟晓  
诗情动梧雨敲秋客梦惊老傍人门非久计不如归去学渊明

### 登寶飞来峰【有井通海在塔下龟公墓越王台在侧】

乘风飞步碧崔嵬万壑千岩入眼来古甃直穿沧海破浮图高拂白云开龟公埋没  
今无冢乌喙登临旧有台立尽斜阳欲归去一声孤雁过蓬莱

### 题吴实斋北山别业

北山佳景胜南山乘兴登临眼界寬樵斧伐云春谷暗渔榔敲月夜溪寒一区池占  
林泉胜四面天开图画看竹屋数间尘不到主人日日凭阑干

### 书馆

池馆深深锁翠凉课余多暇日偏长屋连湖水琴书润牕近花阴笔研香吾道尚存  
贫亦乐客身长健老何妨十年心事闲搔首厌听蝉声送夕阳

### 依綠亭

数椽潇洒瞰清漪荡漾烟霏欲湿衣  
阑角寒光摇翡翠檐牙倒影浸琉璃  
荷边鼓瑟游鱼听柳外敲棋睡鹭飞  
洗尽红尘青眼客临流何惜赋新诗

### 秋思

天容凝碧换秋容残暑冷然一洗空  
梧叶多应愁夜雨葛衣渐觉怯西风  
十分淡冷砧声外一片凄凉雁影中  
兴动莼鲈欲归去季鹰心事恰相同

### 题四畅图

四畅图中四散人藤床对坐遣闲情  
搔头真有爬梳态搔鼻应无喷嚏声  
扞虱未闻谈世事捻须元不为科名  
一时快意皆真乐谁把丹青写得成

### 登寶林塔

屹立浮图可摘星吟边喜与客同登  
阑干六曲又六曲梯级一层高一层  
极目江山无碍障着身霄汉欲飞腾  
鴈来疑是题名处拂拭残碑问寺僧

### 偶述

漂泊江湖祇自怜人生穷达信關天  
老难干禄心灰矣贫不求人气浩然  
五斗岂能留靖节一瓢亦足乐颜渊  
客来问我生涯事闭户开书对圣贤

### 凉夜即事

凉入虚堂睡思浓夜深翦尽烛花红  
光摇珠箔梧桐月香透纱厨茉莉风  
欹枕觉来人不寐捻髭吟罢句难工  
小蛮问我诗成未诗在池塘草梦中

### 次月山少监客京韵

匹马搀春入帝京秋深犹未问归程  
一书不及因风寄千里空教共月明  
霄汉已随黄鹄举家山应负白鸥盟  
便须了却封侯事衣锦归来客亦荣

### 闻角

渔角咿呜到枕边边情似向曲中传  
梅花三弄月将晚榆塞一声霜满天  
织锦佳人应有恨枕戈老将想无眠  
争如二月春风市卖酒楼头听管弦

### 舟行送王琴所之澈川

晨星寥落曙光浮柳岸风轻送客舟  
万点远山重叠恨一江流水浅深愁  
淡烟茅店家家晓白露枫林处处秋  
独倚蓬牕还自笑此身漂泊愧沙鸥

### 寄峡山胡府判

鉴湖狂客又西湖笔砚生涯计已迂  
五斗自惭腰不折四方安得口能餬  
家山迢递乡心远灯火凄凉客影孤  
莫恨风前看落雁尺书还肯寄来无

### 送姜仕可去馆

行止非人可预谋爱君无计与君留  
张仪失策犹存舌穆传知几可掉头  
黯黯别懷江路晚萧萧行李驿亭秋  
明年我亦携书去不落人间第二筹

### 梅龙

孤根蟠屈浸冰湖蛰里阳和发朽枯  
雪树鳞封寒水玉月梢颌吐夜明珠  
暗香吹冷



龙涎湿疎影涵清蜕骨癯安得华光叶公笔共描横水卧云圖

江湖佛观

环峙山川秀气鍾人烟楼阁郁重重潮生潮落东西浙云去云来南北峰海曙扶桑  
红影湿堤春杨柳綠阴浓子胥已遠岳侯死斗酒聊浇磊魄胷

随隐为祝南山赋

踪迹何拘似白云不寻丘壑避红尘田堪耕稼即莘野水可钓鱼皆渭滨无碍滞心  
宁择地有幽闲处便容身一筇忽入青山去岂是终南快捷方式人

春日郊居

卜筑幽居慰寂寥数椽茆屋傍江郊庭前滕薛笋争长篱下陈雷蔓结交杏圃花香  
蜂课蜜芹塘泥暖燕营巢山牕对景浑无事吟得诗成手自抄

偶书呈王修竹

琴心不复寄松萝贺鉴湖边水自波晚节黄花秋思淡夕阳红树客愁多何时归鹤  
招丁令有意逃渔侣志和不管白头乌帽落西风一曲付狂歌

寄郭枢山

起敬英声亦有年酒边曾见锦囊篇吟情六义初删后古意三爻未画前放旷嗣宗  
应絕俗清狂太白不妨仙如今海内无工部谁肯题诗寄郑虔

灯花

发生元不假栽培一点春从午夜回自喜结根依小草不愁飞片点苍苔荧荧有艳  
蛾频扑淡淡无香蝶不猜牕下敲棋红烬落更深约客未曾来

乐道

门掩荒苔客到稀闲情已与世相违胸中宇宙自然景眼底江山不尽诗云淡风轻  
皆道体鸢飞鱼跃总天机吾心与物同真乐此处宁容俗子知

次毛一斋韵

诗梦惊残何处棋书牕又是夕阳时柳阴分綠笼琴几花片飞红点研池览镜自怜  
添白髮传杯不复倩蛾眉东风故国年年恨唯有啼春杜宇知

寄月山少监

一片襟懷海樣寬眉头肯为别离攢臂鷹惯识从君乐汗马宁辞行路难角带边声  
關月冷雁传乡信塞云寒归来未许东山卧见说苍生望谢安

送文正公遗像与王东庐

古画来从寶绘堂遗君敢惜旧珍藏貌存故国三公贵泽衍来孙百世芳家庙几年  
成阙典宗支此日倍增光当时种德根苗遠分得槐阴到鹤乡

遊西湖次毛玉田韵

触目钱塘昨梦非行春载酒忆当时花间不碾香轮入柳外空鞭骏马飞落日荒山  
和靖墓断云流水子胥祠忘情鸥鹭闲干我应笑江湖尽未归

故国有懷呈任子宏提举

十年不作还家梦荒草深深锁竹扉无主落花随水去有情啼鸟劝人归  
儒冠寥落风流减客路凄凉故旧稀何日携琴赋归去踏云自采故山薇

寒夜即事

倚徧阑干更漏长柔髭捻断为诗忙清分梅影夜宜月寒入雁声天正霜  
怀古顿添孤客恨追欢难学少年狂读书牕下篝灯坐一卷离骚一篆香

谢章平惠笔

管城二子樣尖新分惠山房胜与金淮兔扳毛夸匠巧鲁鱼正字见功深  
抄书未得纖毫力握管难忘一寸心挥翰玉堂无梦到雅宜茅屋写清吟

龙江馆舍

幽栖俗事不相關家在青松翠竹间绕屋四围都是水隔林一片不多山  
诗篇陶写清秋景书册消磨白日间门外沙鸥如旧识忘机飞去又飞还

元日

睡眼朦朧撑不开鸡声唱晓梦惊回竹炉尚有残冬火栢酒初斟新岁杯  
身世百年如梦幻功名两事已心灰门无贺客清闲甚自汲寒泉灌古梅

俞景仁教谕相过

江云舒卷弄阴晴新綠园林似染成花怯晓风寒蝶梦柳愁春雨湿莺声  
栖迟茅屋无尘事深闭柴门遠俗情佳客相过慰岑寂酒边闲把近诗评

修竹有楼名与造化游对秦望山五云门

秦望诸山隐几看仙居缥缈五云端天高地迴三千界月白风清十二阑  
沧海气浸珠佩湿明河影逼玉箫寒超然身在鸿蒙上何必蓬莱跨紫鸾

修竹宴客广寒遊亭分韵得香字

银桥疑驾海天长金粟离离照玉觞影浸山河琼殿冷舞分风露羽衣香  
亦知广莫元无野却笑温柔别有乡闲折一枝惊昨梦素娥怜我授玄霜

酒边呈张景纯【能画山水】

蓬莱阁上笑谈余别后思君看画圖萍水相逢俱老矣家山自好盍归乎  
清风一榻庄周蝶明月扁舟范蠡湖此是达人真乐事客中何必叹穷途

江上客懷

镜里从渠白髮添吟边抵掌复掀髯十年为客甘清苦一枕忘情付黑甜  
短褐怯风绵未絮破牕漏月纸重粘梅花应念人孤寂寒夜吹香入竹帘

夜坐

香篆烟锁夜气清篝灯开卷遣闲情半牕月落梅无影三径风来竹有  
声乐道何须圖富贵读书元不为功名白云满榻便高卧欹枕诗成梦不成

挽卫山斋

楹梦惊残忽告终儒林多士失宗工云间便觉无清气江上谁能继古风蕙帐夜阑孤鹤怨茆斋人去九山空我来岂为私情哭哭痛君亡吾道穷

武公后裔有仍孙德望才名世所尊拟向山中专注易忽传地下趣修文月楼不复赓诗句春阁犹思共酒樽痛恨死生千古隔西风吹泪湿秋云

送任子敏司丞赴北

鞭影拖云入帝京少年正好作功名不辞驿骑三千里欲奋鹏抟九万程白玉堂中挥翰墨黄金台上被恩荣何须折柳送行色只写诗篇话别情

和俞教授见寄韵

天边日月似梭飞百岁光阴难预期有酒不妨留野客无钱何惜典春衣江山犹记登临处身世都非少壮时晚景清言宜学道黄庭一卷究玄微

任后斋池上有瑞莲命予赋之

芙蕖开处傍池亭花结双头媚晚晴两隗并肩如欲语二乔并首似含情同心净植真奇种聯蒂腾芳以瑞名若使濂溪当日见爱莲有说恐难评

盐

同絺入贡载遗经分赐羣臣羨水晶润下作咸从海产熬波出素似天成享神洁白惟形似富贵珍奇以寶名此物可方为相事他时商鼎用调羹

餅筩

热中竟日自煎烹音调都从一气生缓缓煮汤才蠓眼微微聒耳忽蝇声频惊清梦愁无寐似诉羈情叹不平却笑书生那解此聯诗石鼎羨弥明

书懷

杜门已与俗相违苔径荒凉辙迹稀自爱清凉忘世虑肯求富贵役心机隐居盘谷胜金谷耐着麻衣鄙锦衣百岁光阴皆梦境且看走兔与乌飞

和杜柳溪韵

安贫乐道岂卑微肯羨黄金带十围爵到三公今却有齿踰七袞古来稀满头霜雪客懷老过眼烟云人事非皎皎白驹在空谷好贤谁复咏緇衣

布金润玉隐废寺闲居

梵刹当年聚众僧丛林深处着禅扃金沙布地阶无土玉轴堆函藏有经云树千寻张翠盖烟萝一片展青屏星移物换今寥落古寺犹存栢子庭

和葺庐韵

地僻浑无车马喧禅房修饰称居安庄严固是由心造丹艘多应被眼瞞佛法不须身外觅世緣只作梦中看来欲问无生话万顷西江一吸干

偶成简任肃斋教諭

百年光景易侵寻消遣闲愁只苦吟但觉笔头风雨湿不知鬓底雪霜侵冥鸿已负九霄志老骥空懷千里心富贵倘来应有命何须弹铗扣知音

百岁光阴一转蓬晚年不与少年同事因错处人方省诗到穷时句始工献赋未逢  
杨得意怜才难遇杜司空有时追忆承平事犹道繁华是梦中

贫病交攻久废诗萧然一室独栖迟酒钱已尽琴将典瓶粟无储鹤亦饥豪杰不多  
陈仲举结交惟欠魏无知箠瓢钟鼎都休计毕竟穷通各有时

奉谢月山太守

太守相过庆诞辰贵能下贱见公心行厨鼎列双鱼美众客咸瞻五马临曲唱骆驼  
夸白雪杯传鹦鹉拥青衿宠颁束帛尤增感恩与沧溟一样深

夜坐即事

霜气侵牕冷客毡青镫白髮老堪怜光阴明日又明日世事一年难一年眼底江山  
元似旧胸中风月本无边道人不作阳台梦纸帐梅花伴独眠

和茅亦山先生杂咏

风柳吹花糝白毡莺愁蝶恨有谁怜不知春事又三月堪笑人生无百年清气长留  
诗卷里闲愁不到酒樽边山牕昼永浑无事一榻分云枕易眠

身世飘浮水上蓬闲中清事有谁同吟牕梦草添诗料画笔生花夺化工酒后乌乌  
时击缶愁来咄咄自书空园林寂寞春何处春在桑麻雨露中

破砚尘封懒赋诗晚年才思觉衰迟耽书自笑已成癖煮字符来不疗饥风月满懷  
诗可写雪霜侵髮镜先知太公八十方荣遇把钓溪边更待时

端午月山主人酒边即事

牕外葵榴照眼明香蒲沁酒注银瓶自无量饮堪同醉非慕清名效独醒一日沈湘  
悲楚客千年吊古读骚经他乡记节聊随俗艾虎朱符挂户庭

时序催人易白头端阳懷古客添愁朱符不写湘累恨角黍难包楚国羞记节何妨  
斟蚁酒夺标无复见龙舟高歌思遠楼前路掩雨珠帘今在不

寄谢蔡松江路教

一别丰标又一旬尺书多荷寄殷勤交游满眼谁知已契阔關心独忆君蕙帐梦寒  
同夜月松江人遠隔秋云明朝便买扁舟去来访贞阳旧广文

和杜柳溪韵

白髮垂垂一老夫年来渐觉世情疎石床梦冷和云卧茆屋灯残共月居客至何妨  
賒鲁酒家贫不肯典唐书羨君种柳清溪上借我苔矶学钓鱼

和茅亦山秋感懷

老来吟拙自知羞好景无诗未易酬湖海愁看今夜月功名虚度十年秋清光偏照  
卢仝屋孤影自登王粲楼我欲乘风蟾窟去安能与世共沈浮

茅亦山相过

故人过我竹边居谭笑从容乐有余洗盞共尝春瓮酒挑鐙对读夜牕书归来尚忆  
渊明菊高卧谁知诸葛庐醉后达观今古事寥寥千载只须臾

上廉访分司官

行部巡荒察吏奸皇皇使节古刑官声摇天上星辰动清过云间风露寒肃政严持三尺法恤民特放十分宽香名已覆金瓯底便作他年宰相看

和郑枢山竹夫人韵

玉环倾国起安兵有色终污后世名九夏专房何在貌一身空洞若为情宠名本自无心得妇节从来彻骨清愁见婕妤秋后扇共怀幽恨几时平

斑竹夫人

汗清书墨沁微凉李卫曾携近竹床眼孔盈盈看热客泪痕点点泣秋房湘纹冷淡宜湘簟玉体玲珑称玉郎秦虢疏封无梦到傍人空以睡为乡

遊虎丘山寺

浮生偷得片时闲古寺寻僧借景看楼阁倚云山气湿辘轳卷水涧声寒地埋吴剑痕犹在碑刻唐诗字未漫寄榻禅房不知晓起来松日已三竿

贾秋壑圃

不学苍龙卧浙东惊风吟佩堕青璫既无长策安江左空有名园似洛中危栈连云晴亦雨飞楼近海夜生风人间富贵皆尘土回首吴山落照红

闻鹤

寒蟾初上海云收何处仙禽过庾楼清夜照人千里月碧霄警露一天秋玉笙缥缈缙山去羽袂蹁跹赤壁游回首女墙旧时事千年华表动新愁

和毛宣慰蓬莱阁韵

杰阁翬飞翠霭间蓬莱元不在人寰绿围城廓千村水青遍帘栊四面山华表鹤归辽海远高台凤去夕阳间我来倚徧阑干月云锁重门夜不关

送张按察移节江陵

满载琴书事宦游皇皇使节重咨諏蒲帆风饱三千里绣斧霜寒十六州荆渚行观新德政越人共忆旧风流市桥衰柳难攀折只拟梅花送去舟

次郑朴国正见寄

云深红日出林迟晞发檐前力未衰老爱归田追靖节狂思入海访安期春风巷陌梅花后故国江山杜宇时一种闲愁无着处倚牕重读寄来诗

渔舍观梅寄修竹韵

寒云汉漠护墙阴潇洒梅枝出竹林影落荒矶和雪钓香浮老瓦带春斟几凭水驿传芳信祇许沙鸥识素心回首孤山千树远扁舟乘兴梦中寻

赠大禅寺昉上人

佛屋参差傍水涯天然富贵属僧家油幢碧立当轩竹步障红围绕槛花隐隐磬声春昼永亭亭塔影夕阳斜白头道者留连客自汲山泉煮石茶

赠通玄观唐道士竹乡

通玄道士苦修行坐见桑田几变更云屋苔封烧药灶风林花落煮茶铛休粮剩有青松啖却老应无白髮生月满竹乡骑鹤去欲邀子晋学吹笙

夜宴

醉月飞觞兴未阑蓬壶影里漏声残碧浮金鼎香脂暖红闪银台烛泪干艳曲喜听催拍近狂歌自觉入腔难赏心乐事输年少一点闲愁了不干

隐居

编茆卜隐读书林门掩苍苔一径深当户晓山长识面临牕夜月独知心花围锦绣翻红影竹列琅玕舞翠阴别是一般清富贵何须满坞积黄金

见梅

孤根偷转一分阳枝北枝南次第芳照水晓妆水镜冷横空雪树冻云香未成林实调金鼎先占春魁伴玉堂因忆西湖林处士年年觅句为伊忙

挽任宅云

方拟荣除上玉堂玉楼有召返仙乡才过贾谊同年少齿长颜回一岁亡师友交情从此絶死生异路寔堪伤云边宅在人何在肠断西风泪几行

寄王爱梅【塔下开馆】

诸生归去暮庭空塔下游观倚瘦筇千尺寶轮擎海月七层金铎话天风升堂尽可同僧饭持钵何须听寺钟好把新诗题旧壁他年应有碧纱笼

送人归洛

白眉公子气昂昂年少多才姓氏香腹饱儒书宗孔孟心传医学祖岐黄秋亭听鹤游吴会春馆看花忆洛阳老我自怜身是客江湖又送客还乡

上李承旨学士三首

儒林学海老宗师每恨闻名识面迟一部山川司马记百篇风月谪仙诗玉堂挥翰思当日金鼎调元定此时抱负大才应大用行看事业迈周伊

表表声名动缙绅金銮奏事旧词臣胸中千古渊源学天下十分端正人犹记演纶依日月行看听履上星辰枝南枝北云山异何日抠衣拜后尘

中朝人物总称贤恬退闲居又几年独抱丹心长恋阙因思綠野且归田未应隼軌淹东鲁行看文星照北燕见说君王思国老鹤书即下九重天

寄月山少监

南北相望各一天江湖久别思凄然迢遥道路三千里倏忽光阴五六年清节立朝君可羨白头为客我堪怜折梅难寄江南信惟有新诗数十篇

哭刘月邨

交游惟子独相知此老天乎不憖遗行辈雕零亡益友文风寥落失儒师在生曾与传遗像临死犹能寄别诗月落邨空人不见伤心千古隔幽期

三山秀气孕英奇表表才名冠一时唐殿策高賚不第荆州人去粲何依传家有子

犹堪羨埋骨无山亦可悲留得帚金诗稿在灯牕读罢泪沾衣

和仇山村九日吟卷

暮秋景物觉荒凉触景凭高遯杳茫归隐清如陶靖节苦吟瘦似沈东阳烟横晚浦  
蒹葭碧霜落寒林橘柚黄追想故宫当日事赐奠宴罢谢君王

寄钱竹深

梦断膏粱记几年舍身事佛絕尘緣把茅盖屋孤峰顶片衲蒙头万竹边支遁才高  
交杜老參寥诗好动苏仙何当尽弃人间事特地来参一击禅

见天地心【松江府学题】

乾坤主宰妙难窥识破端倪便可知阳动于阴分太极剥穷必复露真机化工自有  
经纶处生意元无间断时万象皆春从此始细参羲画究精微

白雁

征鸿素縞过南楼衣褐同羣孰与俦云外排行分玉李天边印字带银钩高飞遠塞  
疑云鹤低落平沙类雪鸥夜月芦花无认处惟闻嘹唳数声秋

即席和卫山斋韵并呈顾渊白路教

烛夜飞觞客在山同看明月上云端粘天水阔蟾光湿卷海风高蜃气寒会友幸逢  
三益在娱情休恨四并难座中喜有能诗者便作唐诗顾况看

梅魂【武林试中】

梦觉罗浮迹已陈至今想象事如新相思一夜牕前月似见三生石上春  
的的孤芳水气魄疎疎冷蕊雪精神料应楚些难招至欲倩花光为写真

甲子岁旦

天开正旦宿云收宇宙阳回和气浮歲换上元新甲子时同太古旧春秋朱颜不逐  
年华改清思惟从造化游栢酒满斟吟兴动题诗记节自賡酬

○絕句

书懷

万卷诗书千古事一燈牕火十年心功名梦断身无用闲补离骚学楚吟  
偶成

渊明觉是新愁少伯玉知非旧恨多毕竟是非皆一梦百年梦醒事如何  
暮春

芳事阑珊三月时春愁唯有落花知柳绵飘白东风老一树斜阳叫子规  
书灯

书幌低垂风不来兰膏花暖夜深开剔残犹有余光在一点丹心未肯灰  
海棠

脸晕轻红酒力微真妃半醉夜深时杜鹃叫落花梢月独倚东风睡不知  
春阴芍药

点滴檐声湿径云翻阶红药带啼痕可怜花片都零落雨露虽多不是恩  
芭蕉

翠叶离披傍竹林几年雨露受恩深绿章封事今无用空对西风抱赤心  
闻角

谁送寒声入梦中遥知人在戍楼东明朝梅岭花飞雪未必都因昨夜风  
酒家

风飏青帘出杏林行人未醉瓮头春安知涤器茆檐者不是相如行辈人  
赠医者花道人

藜杖横肩过竹扉半挑药笼半挑诗笑予盘礴山云里泉石膏肓作么医  
漫述

百拙懒营生计事一贫方识丈夫心箪瓢陋巷皆真乐何用多藏郿坞金  
青春易过不多日白昼得闲能几人有限光阴空役役堆钱难买百年身  
对客莫谈当世事闭门且读旧时书蓬菜献赋心犹在只恐无人荐子虚  
楚江何忍沈清客周粟安能活饿夫慨想前修千古事孤忠高义后来无  
逢人休要说公卿老去无心慕宠荣李不封侯刘不第千年青史亦传名  
世事艰难如意少功名荣耀误人多浮云富贵非吾愿且买扁舟理钓蓑  
脱巾漉酒心先醉着屐登山脚便轻浩饮清游忆陶谢古人千载尚留名  
眼前万事等一梦世上几人能百年千古英雄今已矣北邙荒冢草芊芊  
文盟无主江湖冷诗社欠人风月闲老去盍为归隐计却于何处买青山  
烘柳日高花院暖炷沈烟冷竹牕虚闲编怕见伤怀事不读离骚读四书  
一春

新绿园林雨过时黄鹂无语恨春归杨花怕逐东风去搭住阑干不肯飞  
花心醉日蝶先觉柳眼窥春莺未知景物繁华易凋谢一春消得几番诗  
江上

江上支筇眼界宽夕阳影里水云寒凭谁说与闲鸥鹭借我渔矶把钓竿  
送笔与各庵和尚

恨杀毛锥久不灵特分二辈到禅扃难书八万四千字只写多心一卷经  
梅菊

菊清独占风霜国梅白偏宜雪月天晋宋后来爱花者岂无靖节与逋仙  
江景

寒生雁背天将雪冷入鱼腮水欲冰钓艇归来江路暝舟人分火点渔灯  
听雨

老来已觉此身闲近日唐诗亦懒看半榻白云眠听雨一牕帘影隔春寒  
暮春



东风庭院夕阳天恨绿愁红又一年春自要归花自落莫将芳事怨啼鹃  
柳老黄鹂迁别树花残粉蝶绕空林道人不管春光去看了红芳看绿阴  
一鸟不啼春寂寂百花都落雨蒙蒙十分花鸟东风恨半在诗中半酒中  
题漂母饭信图

国士无双未肯臣汉皇眼力欠精神筑坛直待追亡后不及溪边一妇人  
一饭岂能忘漂母英雄未遇有谁知可怜屏底丹青笔不画登坛拜将时  
诗穷

风愁有恨属诗翁终日推敲句未工何苦辛勤学郊岛呕心博得一生穷  
雷潭为定讲师赋

缚草为庵枕碧漪蒲团长是坐禅时一声霹雳惊龙起布袖蒙头总不知  
雪居为安上人赋

云压西湖水欲冰雪封楼阁玉棱层夜来门外深三尺应有齐腰独立僧  
伤春

园林芳事已阑珊梅未生仁笋未竿堤上柳绵风脱尽绿阴应在雨中寒  
雨过

雨过山头云气湿潮生渡口岸痕深一声短笛斜阳外知有渔舟泊柳阴  
即事

花露研朱朝点易药炉分火昼焚香道人不管世间事自觉闲中日月长  
木芙蓉

芙蓉一带绕池塘万绿丛中簇艳妆错认园林春富贵不知叶底有风霜  
论诗

三百余篇岂苦思个中妙处少人知籁鸣机动何容力纔涉推敲不是诗  
书馆即事

烟拖野色入书牕一畝平田隔草塘暮雨初收新水满藕花香杂稻花香  
对菊

菊似灵均带楚愁餐英人去思悠悠西风篱落甘清苦不爱春光只爱秋  
夜景

一池清浸藕花月午夜凉生菰叶风风月无边诗兴动品题收拾锦囊中  
秋池

西风吹露冷银塘菰叶萧疎柳叶黄秋水不知时色老藕花犹学少年妆  
简孙治中归维扬

闻君骑鹤赋归软漫写诗篇问起居后土祠前花在否平山堂下柳何如  
题墨竹画扇

淇澳分清入素纨一梢潇洒胜千竿此君不受人间暑叶叶生风夏亦寒

新昌大石佛

倚天岩石费雕镌佛相分明在眼前莫与嘉州争大小法身充满本无边  
黄菊

压丛秋色万黄英多少金风染得成篱下年来无靖节寒香不似晋时清  
萤火

化形腐草暗生光数点随风过野塘牕下久无人夜读此身不入照书囊  
睡起

满阶竹影扫斜阳一枕秋风桂子香梦里不知身是客觉来依旧在他乡  
寄秋山和尚

几夜孤吟忆贯休疎钟敲月动诗愁何人来入匡庐社分我山中一半秋  
懷友

听雨思君泪欲流檐声滴老鬓边秋何时过我晴牕下共话思君听雨愁  
昭瑞宫月夜

飞仙挟我上瑶坛古桂香中夜倚阑铁笛一声吹月落满身风露不知寒  
东山谢太傅祠蔷薇亭

围棋别墅却秦军千载功名一窖尘今日江山非晋有荒祠花木为谁春  
梦情为懒庵上人赋

栢子烟锁懒坐禅白云半榻伴高眠分明记得庄周蝶飞向梅花雪涧边  
田家

流水小桥江路景疎篱矮屋野人家田园空阔无桃李一段春光属菜花  
春寒

客思重重山色外诗愁点点雨声中着人料峭东风急墙角桃花未肯红  
春寒料峭透牕纱睡起晴蜂恰报衙怪得晓来风力劲满阶香雪落梨花  
池荷

红藕花多映碧栏秋风纔起易雕残池塘一段荣枯事都被沙鸥冷眼看  
听琴

一曲猗兰按玉徽高山流水少人知纷纷耳听非心听安得人间有子期  
蓬山堂访王鹤隐高士不值

蓬莱深处访仙家云护岩扉石径斜笙鹤未归春寂寂青鸾啄碎碧桃花  
过曹娥庙

细雨两山眉黛敛怒涛千古哭声寒须知此庙闢风教莫作寻常神女看  
禹庙行春

大禹祠前柳色新骈阗车马鬪行春登临都道江山好话到平成能几人  
子胥庙

伍相祠前云气昏奔吴心事与谁论怒涛夜半翻江月疑是忠臣一片魂  
西湖行春

画船无复沸笙歌湖水年年自碧波回首苏公堤上柳绿阴不是旧时多  
明妃

和戎何惜遣蛾眉悔悟徒然杀画师汉主深恩如可报妾身虽死亦无辞  
一函香骨埋沙漠魂魄多应绕汉庭惟有春风知此恨年年吹拂草痕青  
炆帝行宫

彩凤楼前汴水流君王不复锦帆游长堤旧日青青柳曾带春风拂御舟  
明皇按乐图

一曲霓裳舞太真谁知鼙鼓动边尘当时若按周姬乐治世音中无乱人  
采莲女

越女兰舟泛绿漪采莲花露湿红衣万荷影里歌声过惊起鸳鸯贴水飞  
通玄观

云气深深护石坛红尘飞不到阑干清阴满地无人迹一径松风鹤梦寒  
林高士隐居

家住西湖深更深古松阴里礼茅君白猿攀树藤花落点破岩前一地云  
吟边

落尽荼蘼燕未归小园寂寂掩柴扉吟边正苦无诗料风递杨花扑客衣  
道士夜醮

步虚声里碧云飞佩玉珊珊谒紫微月浸■〈罍 卩〉风鸾鹤过仙都道士拜章归  
题梅花诗卷后

月香水影句清奇除却逋仙更有谁吟骨春风吹不落此翁已后绝无诗  
赠王琴所

一曲丝桐余古意百篇风月寄闲情君诗即是琴中操底用离鸾别鹤声  
谢聪讲师惠桂花

广寒世界仙家种金粟如来佛国花多谢高人分惠我一枝和月到山家  
客怀

年年春暮客天涯愁见东风扬柳花自叹身如梁上燕营巢长傍别人家  
春夜

银烛烧残听漏声春寒诗思觉凄清一庭夜色无人管分付梨花伴月明  
枕边瓶桂

岩桂花开风露天一枝折向枕屏边清香重透诗人骨半榻眠秋梦亦仙  
问菊

山园独立对秋光一袖西风两履霜笑倚东篱问寒菊自渊明后几番香

半轩疎雨

檐前数点弄晴光  
浥露庭花枕簟香  
池草梦回诗思杳  
吟牕分得一边凉  
蝶

随风粉翅太轻狂  
夜宿花房春梦香  
栩栩不知身是梦  
又将魂梦化蒙庄  
见雁有懷

满眼西风忆故庐  
亲朋音问久相疎  
年年江上无情雁  
只带秋来不带书  
聰讲师湮盘台

莫将生死视如来  
要看莲花火里开  
勘到灰飞烟灭处  
湮盘不是湮盘台  
贈谈命姚月壶

胷中消息千年歷  
舌底穷通一世人  
试把五行推测看  
广文官冷几时春  
中秋对月

十分蟾影照人间  
一片山河古影寒  
惆怅年年今夜月  
人生能得几回看  
秋意

梧叶翻风敲老树  
蛩声带月泣寒莎  
只消些少闲风月  
便觉客牕秋意多  
对菊

春花能得几时红  
万树繁华转眼空  
黄菊虽黄偏耐久  
西风雅淡似东风  
玉绣球花

花神巧学传官樣  
不属针工属化工  
疑是琼瑶初琢就  
一团香雪滚春风  
即事

春晴无处不繁华  
多少遊人逐钿车  
尽道东风花柳好  
谁知生意在桑麻  
九日感懷

新橙初试蟹螯肥  
一曲清歌酒一卮  
料得故园秋正好  
黄花应怪客归迟  
黄蜀葵画卷

蜀质何人为写生  
金杯翠袖捧朝阳  
花前露重宫题湿  
犹带南薰殿里香  
春梦

铜匱艾纳翠氤氲  
六六屏山酒半醺  
梦入中州看秦画  
春风吹乱玉梨云  
题明皇按乐圖

五鳳楼前沸管弦  
春宵花暖月娟娟  
纖腰舞到霓裳曲  
惊起猪龙地上眠  
明皇杨妃图

君王拥袖倚娇容  
指法相同曲亦同  
料想马嵬千古恨  
当年已寓笛声中  
暮景

浮云开合晚风轻  
白鸟飞边落照明  
一曲彩虹横  
断南山雷雨北山晴  
和靖墓

木落孤山墓草荒  
梅花千古带诗香  
吟魂仙去谁招得  
独鹤一声幽恨长

宫词

闻说君王御宴回  
宫人留钥内门开  
琵琶拨尽黄昏月  
不见花间凤辇来  
临平泊舟

客舟系缆柳阴傍  
湖影侵蓬夜气凉  
万顷波光摇月碎  
一天风露藕花香  
钱府旧园

十二峰前富贵家  
乱离不复旧繁华  
亭台寂寂无人到  
流水东风自落花  
春雨词

檐声滴碎玉阑干  
开尽梨花亦懒看  
燕子不归人寂寞  
深深宫殿锁春寒  
山中

万壑松声撼翠微  
夜寒风露湿人衣  
山翁踏月巡幽径  
竹里笼开鹤未归  
客路

春风客路草萋萋  
小驻征鞍日又西  
回首山前云树暗  
竹鸡声里鹧鸪啼  
金陵懷古

六宫禾黍千年恨  
一片江山万古情  
明月不關兴废事  
夜深还照石头城  
仙姑对奕圖

碧玉花冠素锦裳  
对拈棋子费思量  
经年不下神仙着  
想是蓬莱日月长  
山村

小小荆扉傍水开  
竹桥分路入苍苔  
呼童扫去阶前叶  
怕有诗人踏月来  
虎丘阻雨

石阑浸碧涧池空  
池外秋声万壑风  
人倚僧牕看风雨  
亭亭塔影有无中  
山中秋夜

石床弹月鹤听琴  
玉宇凝秋絕点尘  
万里无云银汉淡  
一天风露湿星辰  
寄别方兰室

醉下山楼客袂分  
杖藜犹带碧阑云  
归来纸帐眠清夜  
半梦梅花半梦君  
水仙花

冰魂月魄水精神  
翠袂凌波湿楚云  
雪后清闲谁是侶  
汨罗江上伴湘君  
春闺

屏山梦断整云鬟  
金鸭吹香火未残  
背倚阑干听燕语  
一帘风雨卷春寒  
槿菊

槿菊丛丛绕水涯  
深红浅紫映山家  
平生不识春风面  
篱落秋深各自花  
孔明高卧圖

未用胸中八阵兵  
草庐高卧掩柴扃  
当时不见刘玄德  
谁识先生是将星  
莲花亭避暑

日火烧空海欲干  
莲宫深处昼生寒  
佛家一片清凉景  
借与诗人尽日看

赠易数周仁山

河洛图书非纸上乾坤爻象只胷中烦君细算乘除数吾道何时可变通  
龙江无杜鹃

客里春残又一年落花满地草连天缘何不动归欤兴祇为龙江无杜鹃  
道院即事

月到松庭鹤未眠玄都羽士诵灵篇玉炉烟断瑶坛冷金磬一声霜满天  
暮春

园林芳事已阑珊开尽荼■〈廿縻〉亦懒看深院日长眠听雨重重帘影隔春寒  
伤春

东皇别我太匆匆急景相催鬓已翁杜宇一声花结局人生消得几春风  
即景

篱落西风野老家闲看景物感年华柳衰荷败芙蓉死交割秋光与菊花  
赠上人

懒听人是与人非有耳如聋未是痴不采当时临济喝威王前事已先知  
墨兰

一幅幽花倚客牕离骚读罢意凄凉笔头唤醒灵均梦犹忆当时楚畹香  
寄任子忠

老去懷人鬓已秋江山犹带别时愁碧云不隔相思梦几度吟魂到客舟  
和李蓝溪梅花韵

孤山别后有谁怜踏雪看花又一年几度相思空夜月角声吹恨不成眠  
觅句逋仙琢肺肝声名千古冠吟坛一诗香尽西湖水白雪阳春和者难  
一枝寒玉倚横塘和雪攀来袖亦香插向胆瓶笼纸帐长教梦绕月昏黄  
南枝开编此枝开祇恐飞香落砌苔踏雪诗人应癖好杖藜日日为诗来  
折柳

阳關一曲灞桥春垂绿阴中别恨新漫折青丝千万缕多应绊不住行人  
画笋

锦箨斑斑带露痕毫端写出此君孙清高不肯埋尘土根本虽无有节存  
秋吟

芦花零落点汀洲白鹭飞边泊小舟水落渔矶风露晓残荷数点冷擎秋  
晓径支筇步履迟西风吹露湿秋衣举头凝望青山外万里江天一雁飞  
秋高风急雁来初久客松江岂为鲈好梦不成人睡觉半牕残月夜灯孤  
沦落天涯已白头西风吹帽冷飕飕悲秋未了悲身世一样情懷两样愁  
畧约当门石径斜槿篱深护野人家炊烟起处江村晚一片斜阳万点鸦  
满眼秋光动客情小园闲步杖藜轻黄花憔悴应思晋纔遇渊明香便清

王荆公庙

遗像岿然占古祠  
区区土偶亦冠綏  
无言似想青苗策  
面目犹如执拗时  
项羽台

失计鸿门恨未消  
一身霸业亦徒劳  
当时谩筑台千尺  
争似欹风地步高  
柳

腰舞东风未肯休  
西风吹叶翠眉愁  
谁知此是多情树  
最爱春光最怕秋  
梁燕

梁间两处燕成窠  
来往衔泥带落花  
昵昵并头休巧语  
相依总在别人家  
梅花

竹边篱外树封苔  
两蕊三花带雪开  
蜂蝶只贪桃杏艳  
嫌花冷淡不飞来  
酒家

风飏青帘挂杏邨  
田家新酿瓮头春  
今年米贵无钱糴  
买醉衔杯能几人  
江村

极目江天一望賒  
寒烟漠漠日西斜  
十分秋色无人管  
半属芦花半蓼花  
西山韩太师坟

古墓年深草树荒  
石人石马卧斜阳  
争如潮上逋仙冢  
诗骨埋云万古香  
床屏墨竹

淇澳新梢笔下分  
枕屏墨晕点寒云  
诗人纸帐眠清夜  
不梦梅花梦此君  
和靖墓

西湖卜隐为诗忙  
吟到梅花字字香  
鹤不归来山寂寂  
梅边闲咏月昏黄  
述懷

故乡迢递几时还  
目断长江杳渺间  
一雁天边飞万里  
白云多处是青山  
寓舍古木无叶

桃李门墙万柳青  
诗人茆屋独凄清  
檐前古木无春叶  
可怪东风亦世情  
秋信

荳雨初晴浣溽埃  
报凉梧叶堕阶苔  
一声新雁南楼外  
早送西风信息来  
秋色

虹影界开微惨淡  
雁痕点破更凄清  
一番雨过天容碧  
尽是西风染得成  
秋声

庭外梧桐叶叶风  
楼头过雁砌边蛩  
隔牕砧杵敲残月  
唤起乡愁归兴浓  
秋阴

漠漠寒烟暗蓼汀  
江涵雁影不分明  
一天暝色迷清昼  
云阁西风雨未成  
秋霁

雨过郊墟凉意新  
痴云驳尽十分晴  
隔江一抹斜阳影  
怪向蓼花红处明

秋音心

庭前梧叶雨晴后江上荻花风起时凉绕书牕人未觉葛衣竹簟已先知  
闺情效香奁体

金鸭烟消一字香满懷春恨强梳妆看花又怕东风恶偷隔纱牕看海棠  
泪浣香腮粉未干相思成病怯春寒此情欲向琵琶诉整得琵琶又倦弹  
黛眉愁里敛双蛾别久无书争奈何欲待怨他还又忆怨时较少忆时多  
懒向妆台对镜鸾罗衣怯薄正春寒黄金络索珊瑚坠独立春风看牡丹  
江村即事

江村暝色渐凄迷数点残鸦杂雁飞雁宿芦花鸦宿树各分一半夕阳归  
春日

紫燕评春语画梁黄鹂唤晓啭垂杨博山烟冷书牕静风飏瓶花点砚香  
舟次九山

水云尽处列奇峰螺髻参差杳霭中江岸维舟看不了烟岚分碧入疎篷  
读秦纪

并吞六国独称雄经籍灰飞烈焰中书外有书焚不尽一编圯上汉成功  
修竹馆舍

乳燕衔泥春昼长枕书无梦到高唐桃花红雨梨花雪相逐东风过粉墙  
夏日陪王君玉泛舟鉴湖

波光万顷接天光画舫归来载夕阳一棹湖心天不暑万荷风里满身香  
秋夜登西楼

清逼金英玉露溥姮娥深夜不禁寒桂花香里人敲句倚遍高楼十二阑  
杂咏

柳嫌暮雨莺声涩花怯东风蝶梦寒偶忆故国春色好他乡花柳带愁看  
人非陶令空看菊诗不林逋漫咏梅晋宋后来爱花者输他高节与高才  
天外斜阳犹在树林间宿鸟已归巢黄昏莫把柴门掩恐有诗人带月敲  
穉柳已回春暖意残梅犹结岁寒心百年身世诗中老好景难消几度吟  
新绿园林微雨后落红庭院夕阳时一声杜宇催春去贪睡棠妃未必知  
持螯已饱团脐蟹斫脍犹思巨口鲈风物秋来多感慨天寒酒醒客心孤  
囊底诗成无卖处床头金尽已多时元龙豪气依然在惯守清贫岂足悲  
人无气节何足道腹有诗书自不同实学真才谁具眼江湖难遇杜司空  
地多种竹堪容鹤池不栽莲恐碍鱼小径荒苔人不到闭门闲学换鹅书  
竹林夏日

不受炎光玉万竿仙林便作晋林看此君长带水霜气醉卧绿阴诗梦寒  
滴翠松



老翠蟠空一樣高月分寒影落庭皋哦诗猛把闌干拍宿鶴惊飞露湿袍  
夜牕

香篆烟销夜已闌砚池冰结漏声寒梅花影恋书牕上应待诗人带月看

○补遗

宿甘露寺

山险疑无路萦回一径通钟声寒瀑外堦影夕阳中牕出茶烟白垆分葑火红禅房  
遇耆旧清话数宵同

晚春

老来无复事狂遊倚杖看花动客愁病骨怯寒春不管柳绵风里木棉裘

杂咏

耽书自笑已成癖爇字符来不疗饥风月满懷诗可写雪霜侵鬓鉴先知  
屏岩小稿